

陳眉公全集

國學基本文庫



上海中央書店
印書行

陳眉公全集下冊

壽言

壽汪太公九十有一序

新都汪叔圖孝廉君。以明經登壬午籍。癸巳謁吾鄉邑博。甲午江右臺使者徵君入棘。所得知名士。極一時之選。而君又嘗奏余以公車牘。詔辨雄爽。似其爲人。余子輩亦得飲君懸河之潤。以自飽。叔圖豈匏繫一官者哉。余退而疑。以質君。君曰。翁春秋高矣。昔人負米捧檄。凡以爲親屈也。親老敢擇仕耶。余聞而心奇之。而叔圖又爲予言。翁狀甚悉。公新都兌山之名家子也。今以九十稱鄉祭酒。少時嘗三致千金。悉散去。振其族黨。故人之貧者。性嗜俠。不耐苛碎。以氣誼然。諸折里中。老而裘馬休休。丹輔碧瞳。飲噉步趨。往往猶能踞健。少年上。卽古者修羊公與祝雞老人。無以過也。翁有二丈夫子。伯氏賈而才。仲氏以文行昌於時。諸孫玉樹珠玕。暎帶左右。而翁若長庚太白。灼然獨耀於衆星之間。由今大耋以遞期頤。直煩十屈指耳。况叔圖君次第榮顯。進冠服以壽翁。苜蓿之饌。易而大官。廣文之甕。易而畫錦。郡國守相。且將賜儿授杖。式翁廬而請焉。豈特爲一鄉一國之瑞哉。夫箕範以九宮。隸算以九章。少室之面壁。神仙之大還。皆九也。造化之數。陽老於九。而返於一。自一而變。以至三百六十。有四之不可勝窮。翁正九十而更一矣。雖有巧曆。誰能窮之。新都初屬丹陽。自吳晉而下。號爲東越。輿區黟川。如龍蜿蜒。欲前而黃山紫陽諸峯。南北綰結。又若翔鸞。後先挾霞霧而起。故其中多隱君子。異人。翁之老而游於斯也。倘亦一遇之。則必有琅函蕊笈之祕。能却老而長視者。余敢因叔圖而請焉。翁其有以許我否。

陸宗伯壽序

吾鄉宮保大宗伯陸公。天子凡兩賜存問。其九十恩數。視前加等。萬曆戊戌六月。專遣中書舍人。以羊酒采幣存公於家。一時士女傾城罷市。至嚙食僦屋往觀。公率大行伯達君以下。郊迎使者。公輿而出。騎而入。金冠緋衣。白眉黃髮。端笏馬上。顧盼凝遠。從容炎暑中。灼然有童孺之色。可卽也。詔書在門。公虎拜稽首。事竣則命元孫景元。以笄童趨謝闕庭。上以敬謹嘉公。又以齒德俱尊。優答公。朝廷求舊憲老之典。可謂極矣。伯達君手錄玉音。及卿士大夫之嫻於頌者。彙爲壽言一卷。公謂王言在前。禮不可以序。乃特屬繼儒記一言於末簡。余生晚。猶憶鄉父老言。公辛丑會試時。有太守王公華者。夢入帝庭。庭下數百人羅拜。口舉善人則公姓名也。覺而召公之婦翁李問之。李對曰。「某生平不苟而已。」是年遂以春秋魁天下。入館局。會鄉袞同朝。數數引歸。自後新鄭江陵。虛揆席以待。而終不得籠公。公九十餘。距今辛丑。又垂一甲子矣。俛仰今昔。凡與公出入諷議聯鑣並笏。悉當時號稱一代偉人名位姓字。知雷如霆。後先參差落落。與晨星俱盡。而公齒髮不衰。聰明如故。每談前事。短言可以書紳。長言可以補史。使對公者。竟不知其爲四朝以來人物。卽少年晚進。公目擊其苑枯。而歷閱其陵谷滄桑之候。又不知家凡幾人。人凡幾世。轉眼六十年。棋局屢更。國手顛頓。其神閑氣定。不着而常勝者。獨公一人耳。公未嘗典一正考。然海內正人君子。皆知以公爲師。亦未嘗受一世蔭。然舉伯達君最晚。而以進士歸養者十年餘。又最孝且賢。公淡中得濃。老中得嫩。雖蒼蒼者。有意於調停幅輳之。亦由公見道明。取數寡。生平不苟之行。通於神明。宜若是之壽且康也。公阿羅輔以神仙骨。天神福約以儒者風。故無貴賤。皆幸見公。而不敢望公。無遠近。皆祝公。而不能悉公。卽載在壽言者。特澣渤之一勺。泰岱之一石而已。雖然。古人有云。「人臣上讚令德。則勒於家廟之尊壘。下敘私交。則書於宗塾之碑版。」今朝野之頌禱於公者。抑何其洋洋灑灑也。敢弗記。

諸若其稍可以報公。則今諸山有繪像。龍潭有專祠。與有頌。國有史。或公之所以壽而不朽者歟。而終未能言公之萬一也。俟百歲當更筆而記之。

壽大宗伯平翁八十有二序代

往先生八十時。天子採御史大夫言。拜先生宮保於里第。已又遣郡縣行羊酒存問禮。維時海內士大夫。輸琛瑩璧。登樂獻歌。布武先生之堂。天下無不聞而豔之。去丁亥至庚寅。先生加八有二。其子伯達君成進士。以行人歸。視公於家。披錦衣。舞而進觴。諸孫如玉。婉孌膝上。先生綬紫鬚白。笑更三爵。喜可知也。已丑榜焦太史而下。凡三百人。以與公之子有兄弟懽。於是徵文獻言。前介公壽。而屬青溪使君司執觴之役。諸君則灑酒再拜。遙賡南山之詩。以頌古禮三年大比。與賢者能者則。卿大夫率其吏與其衆。宴國之大老。而賓禮之。以示型焉。今鄧使君儼然卿大夫也。而諸君率又彬彬以賢能起家。則今日彷彿古鄉飲之制。而悼大賓之享。舍宗伯先生。其誰當之。是役也。禮也。獻生晚。幸爲先生之邦人。蓋嘗妄窺先生之學。本於六經。而公家敬興及金谿兩兄弟。則又從千古之上。啓關鑰而授之。故其傳獨正。晚而游衍於竺乾之書。與裴相國白香山揖讓同堂。故其神情獨曠。噦分宜而避其濁。稅江陵而遜其橫。詔三起而三辭之。故其出處獨高。若是者。是亦足以仰窺先生之萬一。然皆貌得其粗。而未睹先生之神者也。嘗聞先生居朝高冠獨步。令人凜凜不霜而寒。乞歸十五年。京洛之下。竿牘如山。卒不得先生片言隻字。其危峻如此。至於告政家居。召布衲爲上客。呼漁樵爲老友。所以提獎後輩。膝語而耳囑之者。靡不肯竅中心。得所欲而去。嘗譬之其立朝如泰岱峨眉。雪中雲半。可望而不可登。退而遊於鄉社之間。如甫田平疇。芸夫牧豎。皆得以嬉笑而托足焉。先生以伯夷之風。而兼下惠之量者耶。夷清如秋惠和如春。春秋相成。萬物化生。吾於先生得壽原矣。夫至人而躋上壽。非特身係天下安危者數十年。卽後生晚達。亦得以有所觀型。而銷

其塵鄙。昔人有言。遇伯夷。展禽。使人不敢言名利事。先生一日而在。則人人遙制。惟恐宗伯陸先生知。媿無以稱先生之子同榜兄弟也。記曰。式黃髮下鄉位三百。諸君以之。詩曰。我有嘉賓。君子是則。是倣先生以之。

壽大司馬楊震翁八十序代

大司馬楊公以萬歷庚子躋大耋。邦大夫與臺使者。以公宿齒耆德。援雲間宮保陸公例。特疏以請。上深居法宮。卽他請或不得俞旨。而獨於國家憲老故典。欲有所崇重。以風示海內。且暮度且下尺一。命守臣勸公於家。三吳父老。豔以爲勝事。而不佞某宜有一言以壽。當嘉靖初。公由進士授司空郎。出歷藩省。典名城。著有勞績。所在俎豆咏歌之。方伯入覲。加資金綺。於是建節江右。陪佐邦土。聲實燁然於朝野間。余在內閣。嘗孳孳向意公。而公亦以言官疏荐起爲南京御史大夫。一時清聲峻格。不在公家震縮后。余解政還山。公亦挂冠以去。天子累召公爲大司馬。不赴。公春秋高。或不可強起。乃今八十。矯步健嘖。聰明精采如壯時。則其請老。蓋有所托。非淺夫躁士所可測識也。自頃朝習一變。豪者插眉樹領。鑽骨置羽。以譏嘲凌侮。務得罪爲高。其次則陰陽委蛇。修繞指帖膝之態。以希合當世。上不成狂。下不成愿。是二者皆非。迺續吉祥之齒。而獨楊公不悠悠而和不皦皦而介。立朝居鄉。一以坦心直道衡之。而天下無不稱其爲寬然大臣長者。此不獨可薰薄敦鄙。爲國家陰釀和平之福要之。不茹不吐。不虧不崩。則斷然大臣相也。公與雲間陸公同籍登朝。陸公九十有二。公亦八十矣。其名位相埒。子孫賢孝亦相等。天子之恩數加禮於二老者。亦且后先相映耀。有如集會名園。圖形僧舍。則公非香山洛社之冠哉。昔潞公以耆英招司馬君實。君實辭以晚進。不敢班文富二公之后。而王宜徽則貽書願入會中。今申公與余皆未七十。亦不敢肩隨事公。但其知齒乞閒。幸不爲少年所描畫。抑或勇退如公者。所樂許而與游也。若否否者。請無援君

實而援王宣徽例。斟百歲觴。從公而後矣。

壽太子少保楊震野八十存問序代

吳門少保楊公。以萬歷庚子爲公攬揆之辰。凡里黨賓客無遠近。謀所以斟酒上壽於公。近者布武遠者傳祝。蓋履錯珠而人鳴玉矣。公委蛇謝客。戒謁者無得內庭實。而顧謂孫僭徐子子爲我乞言於華亭陸公。以贈我。陸公我老友也。壽九十有二。其言信而有徵。余惟肅皇帝辛丑。與公綰綬登朝。皆在綺歲。公由司空郎歷踐藩省。所在祠石可紀。旣而方伯內覲。帝賚金綺以旌其能。出鎮江右。入佐邦土。特進宗伯。再掌司馬。今予已過耄。公亦髮種種且八十矣。天下士君子咸幸公再起。以竟維持世道之志。而因亦幸公永錫難老。以助天子億萬年無疆之祚。乃以謙著循墻。功成納履。雖名賢推轂。聖主賜環。而乞假凡數十章。家食者凡二十載。廳馬可旋門。雀可羅驟。謁之不知公三事九列也。屏城府揭肝膽。不飲醉而醉不挾纒而暖。久習之亦不知公剛正練達。侃侃名世老臣也。其少知公者。以爲公勇退類疏傳。知足類香山。獨樂標園。投閒洛社。類君實。而余獨以爲公家二楊先生近之。楊震清白。却暮夜金。楊綰入相。聞者減驕。從輟聲樂。墨吏望風解綬而去。則庶幾公之清標峻格乎哉。然而事亦有不能盡公者。當肅皇帝三殿災。公於郎署經營拮据。日夜不交睫。所省賚甚鉅。有中貴人意欲染指。增金至八萬餘。大司空不能奪。公爭之。詞色俱厲。中貴人跼蹐謝罪而止。此余所目擊。至今縉紳尙能道其事。頃者兩宮三殿肇舉大工。天子遣中舍人鑿山截河。礦稅四出。當事者疏上不報。莫敢誰何。假令有強項如公。則此曹豈能盜旒纁之明。竭山川之髓。一至於此。乃知老成耆德退而在野。則獎恬抑競。砥柱回波。進而在朝。批逆鱗。落奸膽。其功真有出於少年流俗之上者。故公之嘖笑飲噉。海內聞之。以卜公之盛衰。公之盛衰。海內聞之。更卜世教之輕重。然則公今日之壽而且康也。豈特一家瑞。一國瑞。其天下之瑞與。太史占星者言。壽星照牛斗分野。

間。吳越人多得壽。予長公十有二年。兩勤聖間。今臺使者援余例。走牒長安。璽書駢繁。行復自天而下。予與公一唱一和。並歌帝力於永永矣。况公孝廉君善養能文章。所謂楊氏累世爲三公者。將在於是。余雖老。尙能攜杖酌酒相賀。公能進我於九老堂否。特書一通。付徐子曾孫書之。屏以質之。

壽大參陽谷王公八十序

往癸巳。余有天台游。因訪公於永嘉。公下榻客余者一月餘。出則窮披諸勝。入則臥名園。飽聲樂。往往漏至四十刻。猶相與高談抵掌。不少倦。公如太白長庚。獨殿衆星之末。而余亦如孤竹之當長松。請得白首侍公。爲烟霄物外人。卽百年可期也。計甲午。公春秋八十矣。余過公。荐千秋觴。且復問津於天台桃花。以一言爲祝。公永嘉之名閥也。以才識見賞於張文忠。文忠不敢待以甥禮。而嚴事之。在師友之間。東崖公事無大小。悉調其峭岸憤壯者。以寬大佐之。其苦心隱行。不可勝數。而嗣后一舉西華公。再舉陽谷公。伯仲先后以進士起家。而公尤倜儻闊大。樂善好施。立族約。拓義田。建鄉塾。嚴家訓。又爲設粥糜以賑飢。築城堡以禦寇。此數者。公皆與西華公推東崖未竟之緒。以垂數世樂利之澤。而永嘉父老所爲稽首以願。公長世者也。公出入郡縣。荐歷藩臬。所至以恩威著稱。江陵操切時。公絕不喜爲煩絃急羽之政。陰以希援當路。惟務從寬貸。至有與兩臺面折而不顧者。吳中以是絕不聞梓鼓聲。而公又精青鳥家言。凡一經指畫。科第溢他額。士民至今無不追而思之。其所爲稽首願公長世者。猶永嘉也。公負百鍊不回之才。萬人必往之氣。胸中落落。僅一再試其奇。旋出而旋收之。乃飄然投効。托陽湖之濱。以自老。其囊中之穎。斂而不試。而以試於養生家。謝其所謂進賢者。而削籜以爲冠衣之綉。更以髦皂之囊。更以塵其經世之略。姑試之以部署於家園山水花竹臺榭之間。其名位不大。讎公志。而子姓樹玉琅玕。秀暎左右。皆能揚家聲而嗣國寶。藉令公資適逢年。以黃髮服官闕下。雖能談笑而操鼎食鍾銘之業。然烏能如今日碧瞳丹

輔卽八十猶灼然童孺之色乎。夫八者數之始也。天道以八節成歲功。地道以八方正疆域。音以從律。風以宣氣。咸八也。伏羲作易。始畫八卦。重之爲六十四。演之爲四千九百六十。過此以往。雖有巧曆。誰能窮之。公今正壽域之始也。公所居刺天之峯。其巔有吹臺。相傳爲子晉吹笙處。子晉故王氏飛仙之祖。而公又吸神仙和齋其用世之具。以從事於逍遙遊。其東海諸山。又多異人隱君子。公之老而翔於斯也。倘亦一遇之與。遇則必有琅函蕊笈之祕。可以却老而長視者。願因壽公之日而請焉。且煙霞物外之盟。公業已許余得從杖履間矣。

壽觀察張受所先生八十序

往太史奏壽星。照斗牛分野間。斗牛吳屬也。其下主多壽。余謂星翁歷師之言。浮誇而少驗。意竊自戊戌以迄庚子辛丑間。而後知天意降祥在吳。又獨鍾於吾吳之貴且賢者。陸宗伯九十兩勤璽書。其次郡守蔡公京兆。馮公相國。袁公及今觀察。使受所張公。皆相繼八十。而張公尤矯健壯旺不少衰。張氏爲江東四太姓之一。莊懿公以名位勲伐冠冕一代。而公以進士起家。由司馬郎出歷藩省。典名城。凡更楚更江右。更滇南。又更齊魯。而歸臥山中二十二年矣。當徐文貞柄政。一時郭尖李錐之徒。繞指炙面。揣形附聲。惟恐盼睐吐涕不及。旣而虞卿印解。翟公客散。桃李化爲蒺藜。衷甲起於入幕。閃倏變遷。莫可摹狀。而公以肺腑密戚。前不爲苟同。后不爲求異。能使仇文貞者。心無所置其疑。而諂新鄭者。口無所獻其讚。豈非公之推誠任素。素信於士大夫間哉。公居家孝友有禮法。遇子弟不肅而嚴。遇賓戚不言而信。遇出處怨恩醜好。噴笑不辨而晰。不習而忘。巍然如定僧。高士渙然如春冰。釋而秋籜解也。貌日以閑。而望日以重。后生晚進。禮之爲庚桑。而郡國守相尊之爲祭酒。敦社飲則社往。敦賓筵則賓筵往。甚則布衣窮巷。吉凶之禮。却巾車不御。挈子弟徒步往。路人狎習之。不知爲觀察。張公卽知公。亦不知公。於文貞新鄭時。嶽

嶽中立有萬夫不可奪而九折不能回者。昔樂天處牛李交惡之會。身名泰然。其退休早也。子瞻上可侍玉皇。下可陪乞院。其晚年摧折多也。公於二公之所遭。兩無處焉。而生平素風大節。則甚近上。然樂天無子。今遠公膝前者皆賢子孫。孫且登賢書矣。古籍一編。殘棋數局。所在休休。又無子瞻儋耳遷謫之苦。至於八十大耄。壽而且康。又非二公所敢望也。彈丸峯。柳黃髮宿齒。貴相望於里中。公與馮京兆諸先生。映帶宗伯。若曉月之輔長庚。真足侈東南一時盛事。何必羨耆英於畫圖史冊之上哉。余往矣。不及登堂爲公斟酒佐觴。乃授言於猶子維鯤。獻之而遙望壽星在牛斗間。則請爲之灑酒三祝。

壽鍾封公面溪先生八十序

丁未小春。爲面溪鍾封公攬揆之辰。蓋八十矣。余獲與公游。而又與繼甫最。嫗公以小友遇之。嘗陰識公生平。類大儒。類俠。類尊官。類處士。類禪。類仙。類三代以上人物。公少習經生言。不售。肱其書。盡授之子黃門公。黃門爲名臣。授之孫。孫爲名士。間談古今成敗。援據經史。卽通人耆舊。不能難也。類大儒。解紛排難。片言立決。里中不之官府而之公。又好爲德於鄉。所振給甚衆。而公略不介一毫顏色。類俠。車騎冠劍。雍雍甚都。監司而下。爭虛左。引重公爲嚴客。類尊官。退則閉戶吟誦。從里社長老。連娑市中。類處士。名僧古刹。所至留連。解脫自在。獨往獨來。類禪。性好游名山。行必千里。出必經年。卽猿鳥漁樵。不能迹公。而公彌老彌健。讀其詩若紀。皆以爲楊許碧落中語。類仙。坦中直腸。遇人無貴賤。面折無少遜。所撰雲間史。有董狐孫盛之風。此真直道而行者。類三代以上人物。公其龍乎。吾不得而相矣。吾松風俗日薄。封公憑藉子弟。衣馬騶奴。赫奕道上。或關說長吏。以爲里閭雄。一旦移苑爲枯。翟公客散。輒閉門自絕。出則輾折。僂僕不能向人吐一語。是皆公所羞也。公遇變無窘容。處盈無泰色。公不假黃門自重。而人亦不敢以黃門有無輕重公。今已八十。飲噉聰明如故。被服淡素。議論慷慨如故。吾松得公。而炎涼之俗一變。布衣之權始

尊。豈不大快人意哉。繼甫有道君子也。請以余言質公。公卽拒客觴。能不爲我一引滿加酌否。

壽龍江董公八十序

龍江董公以甲寅季冬壽八十矣。遠近束錦羞璧者。涸里巷。而公堅謝曰。無以鐘鼓駭我。往者七十眉公。有壽言實稱知己。至今度之。箇中不敢忘。垂十年而奉天竺古先生之教。於學道更有得。子盍爲我更徵之。於是孝廉次公再拜而請之。陳子返其幣而告之曰。余與公游。凡三世矣。公曩者隱委巷陋室中。炊烟如縷。門槌不閉。里父老過戶外。輒聞讀書聲不絕。識者曰。此中故有人。毋輕睨之。而公亦以此解嘲。曰。吾二孺子非久貧者。蓋一謂長公。一謂次公云。公坦中直腸。淡面鈍口。與人交。魚魚雅雅。自王公大人。以至韋褐下賤。悉以平等視之。胸中不識有涼燠。目中亦不記有菀枯得喪之變。一獲而得長公。中甲午榜。再獲而次公繼之。中丙午榜。公無泰色。長公次公貧。公無窘容。公嘗曰。吾由吳閭入松。每見貴者。十九輪戟。接轡傳圭。而今門可張雀矣。富者左朱右頤。田園甲一郡。法書名畫走四方。而今皆化爲飄風冷雲矣。其少年塲之歌舞。傀儡塲之啼笑。千迴百變。日化日新。而總之博不得北窗一夢。是故月之魄有盈昃。潮之期有往還。花之候有開謝。天地不能逃晝夜之運。聖賢不能逃寒暑之數。而蚩蚩者。迺欲挺陳走捷角而留之。是皆爲學道人所笑也。次公凜凜庭訓。故所居僅庇風雨。童子犢衣繭帽。僅供掃除負郭無二頃。秫田無十石。進能以狷潔見重於長使。而退亦孝悌能見信於公。薦公酒則飲。薦公山穀溪筆則飽。荐公輿則舍輿而塗。大布短笻。逡巡僧舍田叟之間。不知其子爲孝廉。卽公亦不自謂孝廉父也。齋居謝客。賢子孫滿前。而公顧日稱佛號。喃喃以萬計。無論門外事。卽一切兒女之情緣。閭史之臧否。多付之垂簾塞兌中。宛然一龐居士。王龍舒矣。余嘗嘆雲棲老人與吳門申少師皆八十。申公於世福。人願其日增。而雲棲於世福。自願其日減。及今較算。而增減之味。不言可知。此公之學道所以度越世人。而壽不可量。

也。夫公方無意於我相壽者相。而以此勤祝於達人之前。將無爲公所笑。雖然。文行如孝廉。公雖欲却世福。而亦有不得辭者矣。請無引古先生戒。而姑爲我一醉大斗何如。

壽見州黃次公八十序

往丙午秋。遇光祿中祕黃公於武林。光祿邀余。出示古法書名畫。及金石鼎彝。相與評賞。而中祕愛駿馬。調試西湖柳堤上。奔軼絕塵。一時兩兄弟皆岸偉有錦衣玉食之氣。而平居斌斌德素。不輕爲然諾。余識而心奇之。已徵予詩壽其尊人。得次公風格甚詳。乃知三君蓋有門行焉。至是吳伯恭過請余曰。黃次公又八十矣。余與公諸子累世姻婭。又結昆弟交。請子一言以佐百歲觴。余喜曰。余諾詩三載不及奏。微君請。且當屬辭獻次公。次公偉人也。亦真人也。當七歲少孤。里中不逞者將卵而翫之。次公深墨自如。彊直檢衛。豪傑目屬。公卒與伯兄拓上庾。退而折節爲恭儉。所以緩急賑貸於鄉者。惟力是視。閭史書上善賓筵。肅上客。公之淳心。實行皎然。信於賢士大夫及鄉三老之口矣。其最異者。母孺人不戒於火。次公從夢中驚起。冒烈燄負之而出。鬚眉幾盡。子母兩全。見者嘖嘖難之。而次公遂巡退避。自若曰。是人子事何忍。以此市孝名。夫要譽鄉黨。卽恆人無意於孺子。而公豈有心於母哉。特其仁孝迫切之極。蓋天蓋地所見止有一母。心目剝那。實無有火。亦無有身。卽此一念。卽至人入火不焦之境界也。公於此非惟得母。且得道矣。得道以後。視一切菀枯譽誹。得失榮辱之途。凡氣燥而心熱者。皆附光之蛾。而何足以辱公一晒哉。冷不慴於俗情炎。不入於胸次。氣靜神清。大年無涯。而八十又何足云。且吾聞羣真列仙。其登名於絳簡丹籙者。太上惟忠臣孝子。其次節義。其次積累功德。澹泊之士。孝行如次公。又輔之以任俠。百里頌義。千里頌德。卽置身仙行中。度無愧色。故曰。次公偉人亦真人也。伯恭請持余言。屬光祿中祕三君子。率諸孫跽而進觴。次公能無爲余掀髯加酌否。

壽封修撰見峯張老先生八十序

太史君一以辛丑廷擢第一人。是年太子冠婚禮成。上慈聖尊號。覃恩京朝官。太史得封見峯先生如其官。丁未。先生方八十。太史請於廟假休沐。歸上觴。遠近東錦羞璧者錯堂下。太史謝不內。而徵陳子一言爲壽。陳子遜者再。及春時。始得操筆而祝先生。余惟東海公以名臣震朝野。再傳爲黃門。爲侍御。其後甲第駢起。幾十輪而九戟矣。見峯先生獨不獲以經術顯。太史一鳴以先生身親見之。父老云。山川有靈。余謂彈丸峯。何足當君一。要自先生長發其祥耳。先生性軒爽。當家中衰。挺身左右翼。日以孝弟恭儉爲政。自拜封典後。被服朴素。門庭蕭閒。閭史無過書。公府無溷牘。逍遙文史山澤間。丹權碧瞳疾步健。噉度其規模尺幅。蓋古之有道君子歟。陸文定公嘗謂予。吾歷仕途。見浙孫氏再世爲宗伯。其列卿佐侍從者。踵相接於朝。閩林氏三世四尙書。下亦爲郎署牧守。而嘗與孫宗伯季泉林尙書肖泉對山游言貌厥朴。視寒峻無以異。詢其尊人。則約斂檢括更過之。天道忌盈。鬼神瞰高。兩家皆無處焉。其子孫貴盛通顯根本。亦確在於此。今太史君身若不勝衣。言若不出口。端靜狷潔。弘雅精嚴。惟恐隕越先世之家聲。是懼而先生素心素風。嘿相扇助。豈惟不愧東海孫。其意亦欲教太史君事事第一也。自古父子世登狀元者。爲安氏梁氏張氏兄弟繼登者。爲陳氏孫氏一姓二狀元者。爲宋氏翁堦皆狀元及第。而年最少者。爲汪應辰張孝祥三試而元者。幾人。膺首選而他讓者。又幾人。而惟王沂公之博大。呂文穆之寬簡。文信國之忠義。吾朝二羅之風節文章。賢者至今樂道之。君一真其人乎。君一汰雜賓。核掌故。隱然以三不朽自任。而當世亦以公輔期之。若後人邇考其所自出。如歐陽司馬公父。則先生姓字固與之並傳於無窮。其壽又孰與今日多哉。東海公若萌之始芽。侍御黃門若甲之始花。及君一則爛熳矣。栽培護愛。以收碩果之報。是在先生。昔張文孝公爲狀元。性至孝。願以已官祕書郎授父。真宗許之。父年九十餘。見子

入踐樞府。宋人豔爲美談。垂五百餘年。而鮮有繼者。繼之請亦自張氏先生始。

賀馬公一泉八十榮壽序

代季雁山

今天子在宥。憲老乞言。凡諸卿國一切耆頤台耆之士。類得概沾榮施。卽艸萊黃髮。咸奉上德以康。而檇李馬公一泉。亦以蟠。寵佩章紱。閭里以是豔慕。而不知是未足爲公多也。公壯時負射鵰之技。曾以明經舉進士於畿試。禹山君繼起。唾手取雋。命中甲榜。而禹山之子。渥駒千里。疾無留引。曾以毛錐之穎。稍露頭角。公方怡神適志。媮快遲暮。淳如也。緬公往初。其尊人味梅公。以布行義。慷慨厚施。世父則驄馬標風。柱下名家。九族之人。累累負金印。以五花稱貴也。豈不足自張伐哉。雅非公好也。門第鼎盛。瞿瞿蹈禮不踰引年。受服郡國。隆。幽恆典。公視軒若徒。而乃以此芥蒂哉。凡人韜精厚者。發祥深。種德茂者。食報遠。世宗時。富於春秋。倘羨長安遊冶。試其剗犀。以昂頰其間。詎不逢年乎。公固養潛葆真。不盡顯其暉。以附青雲。而蘊五綵。以澤來世。嗇斂之極。結爲大年。今之以八十稱老也。特上壽之始耳。虬楓勁節。不芬泄於繁華。而歲寒終古。幹柯自在。此物理大凡。異日者。庭玉交映。綸渙褒嘉。荷天子寵命。公且以其平格之蝦。享戩穀之慶。奚止循憲老政矩乎。何君侯菴公之分。弟懷梅公壻也。先是其尊人與公游燕。而驩遂成瓜葛之好。今其子孫振振。琳瑯炳耀。原原本本。所從來遠矣。侯菴於公之壽也。雅念冰玉情。不能已已。乃郵書乞言於余。以介眉壽。余與何君姻婭。其子進士君士抑。屬余東牀。而禹山君又余同年昆弟。交愛最深。億昔承乏。檇李欲登堂爲公壽。而未遑以俟。今日乃今日復守建昌。又未能親捧罍爵。以從事於屏楹廊廡之間。俟翁他日至百歲眉壽。余將進以綠玉之杖。紫霞之觴。相與採月。萼湖。泛槎。烟雨。從公索仙李而啖之。未必不勝安期大棗也。於是授言於士抑君。而爲余先侑南山之祝云。

不佞受役鄭藩。里居三載。而以癸巳入竣桐圭之命。比四月。爲首峯先生八十壽辰。余業已脂車秣馬。不佞從賓客後。捧觴而歌南山之篇。及渡江。乃始操墨。卿屬一言爲壽。而勅青鳥獻之。且以重諸兄弟共祝之情。因致不佞年家子之世誼也。夫張之望於華亭也。自東海公始也。公之文章節義。如黃鐘大鏞。峨嵋岱岳。巋然震天下。而其後簪綬纍纍。數傳而至先生。先生博物宏覽。能上下漁畋於四遊六合之間。鶴立雀起。蓋張之聞人哉。先生才高不獲顯。其子龍州先生用乙卯歲進士。又以數奇不獲具萊綵。稱千歲觴。先生笑曰。「夫造化小兒。固欲調我也。吾聞長安粟可飽。金馬門可吏隱。我需次一官。婆娑自老。以待二三孫雛。摩九霄而颺六翮。豈非乃公事耶。」於是謁選得光祿丞掌醢。以覃恩封其父母如已官而未幾。長孫舉乙酉鄉試。其仲若季。皆以茂才異等廩於官。翩翩乎雁行而稱三鳳也。先生遂解綬歸。剪榛洗花。種魚呼故人。父老進而觴咏池上。經案蒲龕。筆床茶竈。先生日徘徊宴笑其間。瞳碧輔丹。宛然如神仙畫圖中人。今八十矣。諸孫琅玕玉樹映帶左右。先生尙能扶持待詔。詔封之榮。譬長庚太白。獨殿諸星。又若高松挺立於岩壑之表。雖中更霜雪。而虬髯龍骨。久之化爲芝苓。以自潤。則先生今日之謂矣。先生之壽辰。與純陽子合。而又自稱首峯。以鳳凰首九峯而出也。今月屆清和。桐影新碧。諸孫捧紫觴而賡白雲之曲。三鳳齊鳴。豈減鈞天韶濩哉。九峯之顛。吹笙拍鶴而來者。又安知非純陽子也。不佞雖渡江。幸敕青鳥還封報我。

壽陳公八十序

我朝二百餘年。民間富庶。頗類漢之文景。然每讀文景詔書。孜孜以孝弟力田三老爲鄉縣師。卽武帝雄才大略。狹小前代制作。然養老之典。往往歲下民間。賜牛酒。賜黍粟。賜淖糜。其八十以外者。則遣長吏閱視丞尉致其家。蓋猶有古意焉。今世俗務末詘本。大賈操計倪之書。入則牙籌嘈嘈。出則裘馬休休。志倣

意得。莫可誰何。而里中白首孝悌力田者。顧反出其下。坐以不急之征。無名之費。脊脊焉竭。蹶重轡而不得怡。是周之豳風不如漢之鹽鐵論也。余與子大夫語。次富家巨室。休養而生息之。可以點綴太平。支吾緩急。而乃使之化爲子虛。而後已。竊爲扼腕者久之。而鑑川翁獨不然。翁之言曰。奉公故樂天而不倦。守分故退讓而不爭。惟謙乃益。惟敬乃老。惟儉乃長。天之道也。翁自少精敏。善心計。不喜忤求。亦不專爲積著。能以拮据攤上賞。田廬日益增。陂塘水堰日益拓。家僮以千指計。紅腐之粟以百庾計。遠近鄉父老拱。手遜爲素封矣。乃翁無重采。無築肉。無園亭歌舞。無闌少年塲。無逐大人游。每晨起。單復親視麥壠稻塋。與漁師農丈人卜水旱。話風雨。不知翁爲鄉賦長也。郡縣召之役。則身詣郡縣。檄之督賦都門。則身詣都門。短褐蹇蹙。蹙蹙往來。亦不知翁爲鄉賦長之祭酒也。當戊子大旱。公捐粟數百石以賑飢民。戊申大潦。亦如之。所活生靈無算。郡守南昌喻公。四明張公。邑令西蜀聶公。兵使者俞公。先後旌廬。特奏冠服以章其善。督學楊侍御。建正學方先生祠。翁又捐金鳩工。崇祀廟貌。最爲弘敞。其他增城堞。刻蘇集。總縣額。會計無大小。皆駢責於翁。如浮萍之散。而復合。落葉之掃。而復下。翁旋責旋辦。又幸而施賴無事。其飢不及餐。臥不甘枕。行不安步。瀝盡數斗汗血。枯盡數莖白髮者。又不知幾矣。迄今日而健武善歌。尙得稱八十老翁。嘻。厥惟艱哉。夫戶樞不蠹。流水不腐。此翁之所以勞也。勞而不伐。有功而不德。此翁之所以能壽也。朝臣八十致政。翁有子如吉生。偶儻嫻文。多賢豪之交。是不可以弛担而樂乎。而翁故爲彼不爲此者。吾以是知翁之識過人遠矣。昔會稽五雲鄉陳氏。惟力耕給足。凡兼井之事。抵質賈販。以取贏者。一切不爲。器用皆朴質堅壯。不加漆飾。蔬食布襦。行之四五十年如一日。陸放翁曰。耕稼之業。一捨而去之。復其故。甚難。予本魯墟農家。祥符間去而仕。今且二百年。竟無一人得歸故業者。聞陳氏事。未嘗不太息傷懷也。吉生誠念翁積累艱難。收斂元氣。恭儉恬素。耕讀並傳。豈特豪賈人挺險逐末者不敢望。卽士大夫求田

問舍汲汲皇皇。進無銖黍以急公家。退無尺寸以庇桑梓。視翁父子得失何如哉。翁少年曾却奔女。其冥德甚多。天之報翁大年。以祚其子孫者。未有艾。漢法徵孝悌力田三老。翁其人也。徵賢良文學。吉生其人也。公九十且近。長吏丞尉行至家。又不徒如放翁之嘆羨於五雲陳氏而已。請以壽翁。并以爲父子好善者之勸。

壽荊石王公七十序

代陸平翁

太子太保婁江王公。以癸卯登七十。中外士大夫輦琛輿璧。登樂獻歌於公之堂者。履綦相錯。公卿門生某某。不敢以筐篚進。而請得余老人一言。以壽公。王公聞而止之曰。華亭老矣。天子憲老而不敢乞言。無以言。溷陸公。余曰。吾雖髦業爲郡人士。與吳邑諸大夫一再佐觴矣。無已。敢效華封之野人而祝公者三。昔孟氏論相業。而曰養氣。羅豫章論王佐。而曰無欲。夫世欲不足以難賢智。賢智之難。難於名耳。故孔子之論平天下。而又本之以無他技。技者名之謂也。大凡士君子一有好名之心。則胸中決無剛大必伸之氣。視其氣之屈伸。以察其人之躁靜。卽賢愚修短禍福。十不失一焉。甯獨事業而已乎。余曩在史局。每歎公科第文章。壓倒一世。然進而遂巡。十大夫間。神清而貌溫。才高而心下。隱若出衆人後者。及新鄭柄政。公嘖喑不合而出。江陵奪情。公正言面折之。又特請省侍。以愧屈之。其氣之必伸者一。江陵敗。公拜相。田間羣少年彈冠易祖。以趨公。公嶄然如絕壁斷崖。人無所附麗。俄効其一。二借事鼓釁者。相繼罷去。其氣之必伸者二。禁詔禁侈。禁貪禁殘。禁撫按無饋贖。緩禁河工。無擬閣。臣不三月而精采濯濯矣。其氣之必伸者三。極論苑操。力剪鯨宦。其氣之必伸者四。清白一心。以風有位。有囊金壽公者。門人故吏。効無貸。其氣之必伸者五。公念皇上深宮燕居。宜使數聞民隱。河南水旱。畫圖鴈鴛。直達御前。上爲之親降宸翰。中宮及貴妃爲親發帑金。而公復以捐俸倡之。河洛之白骨而肉者。無算。非公能感動宮禁至此乎。其氣之

必伸者六。儲議未定。皇上且疑挾制。疑樹功。疑離間。公密疏陳請。甚有手書才絨。同官不見。左右不聞者。至是而始下出閣之命。始定長幼之禮。其氣之必伸者七。公六十移疾請致政。上遣鴻臚內官宣示。又發金禱於藥王三日。以祈公疾。而公意終不可竟歸。其氣之必伸者八。夫匹夫負氣。不能得之平交。公入朝以來。其浩然剛大之氣。無幾微小挫。天子英明神斷。每事委心。俛首而從之。何以得此於君父哉。善乎延篤之言曰。束修以來。爲人臣。不陷於不忠。爲人子。不陷於不孝。莊周云。舉天下譽之。不加勸。舉天下非之。不加阻。是二者。乃公養氣訣也。公方召對時。親承皇上面獎忠孝。退而質公之生平。微獨毀譽不能撼公。卽公亦未嘗以毀譽徇天下士。獨斷獨行。不吐不茹。能爲大容。而不爲小忍。能爲面折。而不爲腹藏。雖朝廷之奏牘。四方之筆札。必暢其喉吻。所欲言而後止。譬之雷霆。無滯聲。黃河無反勢。其胸中剛大之氣。鬱勃而不可遏者如此。而曾有一毫顧忌。爲市名地乎。改文章。博大巨麗。而不欲以文名。清德可師。而不欲以廉名。進而入告。出而焚草。而不欲以忠告名。辭會典。訓錄玉牒之世蔭。而不欲以讓名。爲諫臣。調護爲地方。請恤援解。而不欲以長者名。孝行若曾史。家法若鄒魯。而不欲以道德名。此宰相中無名公也。龍之爲物。潛見飛躍。變化無窮。然劉累氏可以豢。豫且可以困。則以尙有龍之名在。公無名。則無欲。無欲。則生平無不伸之氣。氣伸者神活。神活者命固。公之壽。其可涯量哉。余九十有五。間隱几而讀長生之書。蠕蠕神氣。似不無小證。然養氣不如無欲。無欲不如忘名。則吾於婁江王公。更有進焉。公家編修君聞道甚早。試以吾言質之。

壽靈泉許太公七十序

靈泉許太公七十時。遠近祝者布堂下。琅函寶軸。組繡而進之。太公謝曰。此以加老。不駭則走。惟有折枯松塞圭竇耳。客前觴如初。公堅不得辭。則大集賓客者數日夜。始得罷。太公笑曰。吾行遊。每見鄉父老七